

բեք չէր վառուել այդ կրակը, եթե ոչ, նա այնպես անգուրթ կերպով չէր քարկոծի «սիրահարի գերեզմանը»...

Մարոն մի տեսակ ստրուկ էր, որպես Սոնան. նա ճնշուած էր ծնողաց բռնակալութեան ներքոյ, իսկ Մարոն վաղեմի նախապաշարմունքների, բայց վերջինն աւելի սարսափելի կերպով խեղդում է ամեն մի հոգեկան թարմ եւ ընդաբոյս զգացմունք...

«Յա՛յ, թող սիրէ, լուում էր նա, այդ ոչինչ... աղջկայ կամքով խօս չէ»:

Եւ իրաւ, միթե՞ հայ աղջիկը կամք ունի. միթե՞ նա իր զգացմունքների տերն է:

Տարուբերուելով այսպիսի մտախոհութեանց մէջ, ես բոլորովին մոռացել էի Մարօի պատուերը ճանապարհի ուղղութեան մասին: Ես հասկացայ, որ մոլորուած եմ միայն այն ժամանակ, երբ իմ առջեւ բացուեցաւ մի ահագին կիրճ, որից անցնել անհնարին էր: Ետ դառնալ եկած ճանապարհով չէի կարող, որովհետեւ ամենեւին չէի յիշում, թէ որպէ՛ս յայտնուեցայ այնտեղ, իսկ յառաջ գնալ անկարելի էր:

Ես բոլորովին շփոթեցայ:

Արեւն արդէն սկսել էր թեթել դէպի գիշերային մուտքը, երեկոյեան ցուրտը հետզհետէ դառնում էր անտանելի: Մի կողմից ես զգում էի յոգնածութիւն, միւս կողմից, քաղցը նեղում էր ինձ: Որքա՛ն երկար պետք է թափառած լինէի ես, որ անցուցել էի այնքան ժամանակ. իսկ Մարօն ասում էր, թէ կը հասնեմ որսորդութեան տեղը ո՛չ յետոյ, քան կէսօրից երկու ժամ անցած: Իսկ այժմ երեկոյ էր: Արեւի թեթեւած ճառագայթները լուսաւորում էին սարերի գագաթները միայն, որոնց ստուերը գնալով՝ ընդարձակ եւ հսկայական տարածութիւն էր ստանում:

Ես յիշեցի, Մարօն ինձ ճանապարհ գցելու ժամանակ դրեց իմ որսորդական մաղախի մէջ մի շիշ, դուրս բերեցի, նա լիքն էր գինով: Մաղախիս մէջ գտայ եւ լաւաշում փաթաթած սառն միս: Իմ ճաշն արդէն պատրաստ էր: Նստելով փափուկ խոտերի վրայ, ես յագեցրի իմ քաղցը, սպառուած ուժերս կրկին վերադարձան, ես բոլորովին հանգստացայ: Այժմ ի՞նչ պետք է անել, դէպի ո՞ր կողմ գնալ — կրկին զարթեցաւ իմ մէջ անհանգստութիւնը:

Աչք ածելով իմ չօրեք կողմը, ես յարմար համարեցի վեր ելնել մերձաւոր սարի բարձրութիւնը եւ այնտեղից դիտել, թէ դէպի ո՞ր կողմը կարելի էր գնալ: Այդ տեսեց քառորդ ժամ: Բարձրաւանդակից ես տեսայ սարի միւս կողմում դէպի աջ տարածւում էր մի նեղ տափարակ, որի վրայ տեղ-տեղ նկատելի էին լինում սեւ եւ շարժուն կէտեր, որոնց ամբողջ հաւաքածուն